



Комисија за борбу против корупције

Komisija za borbu protiv korupcije

Povjerenstvo za borbu protiv korupcije

Broj: 01/8-50-3-39-13/25

Sarajevo, 4. 2. 2025.

PARLAMENTARNA SKUPŠTINA BOSNE I HERCEGOVINE  
PREDSTAVNIČKI DOM

n/r predsjedavajućeg Denisa Zvizdića

1915  
B

PRIMLJENO: 13-02-2025			
Organizaciona jedinica	Klasifikaciona oznaka	Redni broj	Broj priloga
01-02-1		442/25	

**Predmet: Prijedlog zakona o izmjenama i dopunama Zakona o mjeriteljstvu Bosne i Hercegovine**

Na 13. sjednici Komisije za borbu protiv korupcije Predstavničkog doma Parlamentarne skupštine BiH, održanoj 4. 2. 2025, utvrđen je Prijedlog zakona o izmjenama i dopunama Zakona o mjeriteljstvu Bosne i Hercegovine, čiji je predlagач Komisija za borbu protiv korupcije Predstavničkog doma Parlamentarne skupštine BiH. Komisija je odlučila da u ime predlagача Prijedlog zakona obrazlaže druga zamjenica predsjedavajućeg Ermina Salkičević-Dizdarević.

Na osnovu člana 104. stav (1) i člana 105. Poslovnika Predstavničkog doma Parlamentarne skupštine Bosne i Hercegovine („Službeni glasnik BiH“, br. 79/14, 81/15, 97/15, 78/19, 26/20, 53/22, 59/23, 87/23, 50/24 i 73/24), kao ovlašteni predlagач, dostavljamo Vam Prijedlog zakona o izmjenama i dopunama Zakona o mjeriteljstvu Bosne i Hercegovine („Službeni glasnik BiH“, broj 19/01) u zakonodavnu proceduru.

U skladu s članom 133. Poslovnika, tražimo da se Prijedlog zakona razmatra po hitnom zakonodavnom postupku.

S poštovanjem,

Dostaviti:

- naslovu
- a/a



Na osnovu člana IV. 4. a) Ustava Bosne i Hercegovine, Parlamentarna skupština Bosne i Hercegovine, na sjednici Predstavničkog doma održanoj xx.xx.xxxx. godine, i na sjednici Doma naroda, održanoj xx.xx.xxxx. godine, usvojila je

**ZAKON  
O IZMJENAMA I DOPUNAMA ZAKONA O MJERITELJSTVU  
BOSNE I HERCEGOVINE**

**Član 1.**

U Zakonu o mjeriteljstvu Bosne i Hercegovine („Službeni glasnik BiH“, broj 19/01) u članu 1. iza stava 2. dodaju se novi st. 3. i 4. koji glase:

„3. Ovim zakonom vrši se usklađivanje s odredbama Direktive 2014/32/EU o mjernim instrumentima, Direktive 2014/31/EU o neautomatskim vagama, Direktive 76/211/EEC o pakiranju određenih pretpakiranih proizvoda označenih masom ili volumenom, Direktive 75/107/EEC o bocama koje se upotrebljavaju kao mjerni spremnici i Direktive 2009/34/EC o mjernim instrumentima i metodama mjeriteljskog nadzora.“

„4. Navođenje odredbi direktiva Evropske unije iz stava 3. ovog člana vrši se isključivo u svrhu praćenja i informiranja o preuzimanju pravne tečevine Evropske unije u zakonodavstvo Bosne i Hercegovine, čime se ne isključuju i druge direktive Evropske unije iz ove oblasti.“

**Član 2.**

U članu 4. iza stava 2. dodaju se novi st. 3, 4. i 5. koji glase:

„3. Vijeće ministara BiH, na prijedlog direktora Instituta, a uz saglasnost Savjeta za mjeriteljstvo BiH (u daljnjem tekstu: Savjet), donosi naredbu o mjerilima u zakonskom mjeriteljstvu i rokove verifikacije za mjerila koja će biti predmet zakonskog mjeriteljstva, kao i uredbu o visini i načinu plaćanja usluga Institutu.“

„4. Direktor Instituta, uz saglasnost Savjeta, donosi ostale provedbene propise iz oblasti mjeriteljstva.“

„5. Zakonsko mjeriteljstvo u BiH obavezno obuhvata mjerila iz harmoniziranog područja u Evropskoj uniji, te po potrebi može da obuhvati i dodatna mjerila od nacionalnog interesa za koja postoje preporuke Međunarodne organizacije za zakonsko mjeriteljstvo – OIML, kao i druge mjeriteljske prakse u državama članicama EU, s tim da zakonskim mjeriteljstvom u BiH, između ostalog, nisu obuhvaćena mjerila televizijske gledanosti.“

Dosadašnji st. 3, 4. i 5. postaju st. 6, 7. i 8.

Dosadašnji stav 6. postaje stav 9. i mijenja se tako što se iza riječi: „u skladu sa“ ostatak teksta zamjenjuje riječima: „standardom BAS EN ISO/IEC 17020.“

### Član 3.

Član 5. mijenja se i glasi:

### Član 5.

1. Savjet je stručno, regulatorno, savjetodavno i kontrolno tijelo Instituta, koje djeluje u okviru Instituta, s ciljem razvoja mjeriteljstva u BiH, odnosno usmjeravanja razvoja djelatnosti Instituta.

2. Savjet je nadležan da:

a) definira strateške ciljeve Instituta i sa aspekta struke analizira i ocjenjuje uspješnost Instituta u pogledu realizacije ovih ciljeva,

b) u dogovoru s entitetskim mjeriteljskim institucijama, predlaže načine zadovoljavanja mjeriteljskih potreba Bosne i Hercegovine,

c) daje saglasnost za donošenje propisa koji se donose na osnovu ovog zakona,

d) razmatra i predlaže načine zadovoljavanja mjeriteljskih potreba u Bosni i Hercegovini skladu s ovim zakonom,

e) učestvuje u formiranju stručnih mjeriteljskih komisija koje razmatraju pojedine aspekte zakonskog mjeriteljstva i rezultate prezentiraju Savjetu,

f) predlaže naučne i obrazovne aktivnosti u oblasti mjeriteljstva,

g) daje stručnu ocjenu godišnjih planova i izvještaja o radu Instituta i entitetskih institucija za mjeriteljstvo u Federaciji BiH i Republici Srpskoj na zahtjev Vijeća ministara BiH ili resornog ministra,

h) prati rad Instituta, uključujući sadržaj, obim i kvalitet realizacije godišnjeg plana, te usklađenost godišnjeg izvještaja s planom rada,

i) prati provođenje nadzora nad provođenjem Zakona i podzakonskih akata donesenih na osnovu njega.

3. Vijeće ministara BiH imenuje sedam članova Savjeta iz stava 1. ovog člana na osnovu objedinjene šire liste istaknutih stručnjaka iz oblasti mjeriteljstva u BiH koju dostavlja Institut zajedno s biografijama predloženih kandidata, i to tri s objedinjene liste istaknutih stručnjaka iz oblasti mjeriteljstva u BiH koju dostavlja Institut i po dva s predloženih lista Vlade Federacije BiH i Vlade Republike Srpske.

4. Istaknute stručnjake iz oblasti mjeriteljstva predlažu Institut i entitetske vlade, najmanje po pet kandidata, a njihova ekspertiza se zasniva na iskustvu stečenom u radu mjeriteljskih laboratorija, tijela za ocjenjivanje usklađenosti, u radu akreditacionih tijela kao ocjenjivači/eksperti u oblasti mjeriteljstva ili kroz rad u akademskoj zajednici u oblasti mjeriteljstva i mjerne tehnike.

5. Mandat članova Savjeta je četiri godine i mogu biti imenovani najviše dva puta uzastopno. Članovi Savjeta biraju predsjedavajućeg između članova na mandat od jedne godine. Isti član Savjeta ne može biti predsjedavajući dvije godine uzastopno.

6. Odlučivanje se odvija na sjednicama Savjeta na sljedeći način:

a) Sjednicama mora prisustvovati najmanje polovina od ukupnog broja imenovanih članova Savjeta iz stava 3. ovog člana.

b) Odluke se donose većinom glasova od ukupnog broja imenovanih članova Savjeta, gdje za donošenje odluka moraju biti zastupljeni glasovi po jednog člana predloženog iz oba entiteta i jednog od strane Instituta.

c) Ako Savjet ne donese odluku koja se tiče davanja saglasnosti na donošenje propisa, ne održi sjednicu ili nije imenovan, tada Institut dostavlja propis Vijeću ministara BiH na usvajanje, bez odgađanja.

7. Poslovníkom o radu Savjeta bliže mogu se urediti i neka druga pitanja značajna za njegov rad.

8. Savjet održava sjednice najmanje kvartalno u toku jedne godine, a po potrebi i češće.

9. Na sjednice Savjeta se obavezno pozivaju direktor i zamjenik direktora Instituta, te direktori entitetskih institucija za mjeriteljstvo.

10. Savjet o svom radu izvještava Vijeće ministara BiH najmanje jednom godišnje ili na zahtjev Vijeće ministara BiH.

11. Ako član Savjeta odsustvuje s dvije sjednice uzastopno bez valjanog razloga, predsjedavajući Savjeta pokreće njegovu smjenu prema Vijeću ministara BiH.

12. Članovi Savjeta imaju pravo na naknadu za rad i za troškove prijevoza na sjednice Savjeta, u skladu s odlukom Vijeća ministara BiH, te će se ovi troškovi planirati u budžetu Instituta.

13. Stručne i tehničke poslove za Savjet obavljaju odgovarajuće stručne službe Instituta.”

#### Član 4.

U članu 10. stav 3. riječi: „konsultacije sa Savjetom“ zamjenjuju se riječima: „saglasnost Savjeta“.

#### Član 5.

U članu 12. stav 1. riječi: „konsultacije sa Savjetom“ zamjenjuju se riječima: „saglasnost Savjeta“.

#### Član 6.

U članu 13. stav 2. riječi: „konsultacije sa Savjetom“ zamjenjuju se riječima: „saglasnost Savjeta“.

#### Član 7.

U članu 15. stav 2. iza riječi „akreditiranja“ stavlja se tačka i briše se ostatak teksta: „u skladu sa evropskim standardima serije EN 45000, odnosno ISO 17025 ili proceduru jednakovrijednu proceduri akreditiranja.“

#### Član 8.

U članu 16. riječi: „konsultacije sa Savjetom“ zamjenjuju se riječima: „saglasnost Savjeta“

#### Član 9.

U članu 21. stav 5. riječi: „konsultacije sa Savjetom“ zamjenjuju se riječima: „saglasnost Savjeta“.

#### Član 10.

U članu 22. stav 1. dio teksta koji glasi: „ili po pravilima koja su jednakovrijedna kao i pravila akreditiranja“ briše se.

U članu 22. stav 2. riječi: „konsultacije sa Savjetom“ zamjenjuju se riječima: „saglasnost Savjeta“.

#### Član 11.

U članu 26. briše se stav 2, kao i oznaka stava 1. arapskim brojem 1.

#### Član 12.

U članu 27. u stavu 2. briše se dio teksta koji glasi: „ili proceduru jednakovrijednu akreditaciji“.

#### Član 13.

U članu 29. stav 4. mijenja se i glasi:

„Naredna verifikacija mjerila vrši se u rokovima koje za pojedinu vrstu mjerila propiše Vijeće ministara BiH na prijedlog Instituta, a uz saglasnost Savjeta.“

#### Član 14.

U članu 33. stav 1. mijenja se i glasi:

„Direktor Instituta, uz saglasnost Savjeta, propisuje način i sadržaj mjeriteljskog nadzora za mjerila u skladu s članom 4. st. 3. i 5. ovog zakona.“

U članu 33. stav 2. riječi: „konsultacije sa Savjetom“ zamjenjuju se riječima: „saglasnost Savjeta“.

#### Član 15.

U članu 39. stav 1. riječi: „konsultacije sa Savjetom“ zamjenjuju se riječima: „saglasnost Savjeta“.

#### Član 16.

U članu 42. stav 2. u zagradi dodaju se sljedeće riječi: (član 5., stav 12.; član 6.; član 7., stav 1.; član 8., stav 2.; član 11., stav 4.)

#### Član 17.

Član 43. mijenja se i glasi:

„Vijeće ministara BiH, na prijedlog direktora Instituta, uz saglasnost Savjeta, donosi uredbu s tarifom o visini i načinu plaćanja usluga koje Institut pruža trećim licima.“

#### Član 18.

U članu 48. iza stava 4. dodaju se st. 5, 6. i 7. koji glase:

„5. Vijeće ministara BiH će, na prijedlog direktora Instituta, uz saglasnost Savjeta, u roku od 30 dana od dana stupanja na snagu ovog zakona, donijeti nove podzakonske akte za njegovo provođenje, a koji se odnose na definiranje mjerila koja su dio zakonskog mjeriteljstva u skladu s članom 4. st. 3. i 5. ovog zakona, i to Naredbu o mjerilima u zakonskom mjeriteljstvu i rokovima verifikacije i Uredbu o visini i načinu plaćanja usluga Institutu za mjeriteljstvo BiH.,,

6. „6. Svi podzakonski akti koji su u prethodnom periodu doneseni bez učešća Savjeta za mjeriteljstvo BiH biće ponovo doneseni u roku od šest mjeseci od dana stupanja na snagu ovog Zakona uz učešće Savjeta za mjeriteljstvo BiH.“

„7. Stupanjem na snagu ovog zakona van snage stavljaju se: Naredba o mjerilima u zakonskom mjeriteljstvu i rokovima verifikacije ("Službeni glasnik BiH", broj 71/23), Naredba o mjerilima u zakonskom mjeriteljstvu i rokovima verifikacije ("Službeni glasnik BiH", broj 67/12), Naredba o izmjenama i dopunama naredbe o mjerilima u zakonskom mjeriteljstvu i rokovima verifikacije ("Službeni glasnik BiH", broj 75/14), Naredba o određivanju vrsta mjerila za koje je obavezno ispitivanje tipa i pregled mjerila ("Službeni list SFRJ", broj 26/84), Naredba o periodičnim pregledima etalona i mjerila ("Službeni list SFRJ", broj 26/84), Uredba o visini i načinu plaćanja usluga Institutu za mjeriteljstvo BiH („Službeni glasnik BiH, broj 71/23), Pravilnik o mjeriteljskim i tehničkim zahtjevima za mjerila gledanosti ("Službeni glasnik BiH", broj 75/14), Pravilnik o mjeriteljskim i tehničkim zahtjevima za mjerila gledanosti (peoplemeter) broj 03-02-3-1364-2/12 od 11. 3. 2013. i drugi akti kojima se reguliraju ili su regulirana mjerila televizijske gledanosti. Ostali propisi i akti ostaju na snazi dok ne stupe na snagu novi podzakonski akti iz st. 5. i 6. ovog člana.“

#### Član 19.

Ovaj zakon stupa na snagu osmog dana od dana objavljivanja u „Službenom glasniku BiH“.

## **OBRAZLOŽENJE ZA DONOŠENJE IZMJENA I DOPUNA ZAKONA**

### **I. PRAVNI OSNOV ZA DONOŠENJE PROPISA**

Ustavni osnov za donošenje Zakona o izmjenama i dopunama Zakona o mjeriteljstvu Bosne i Hercegovine sadržan je u odredbama člana IV/4.a Ustava Bosne i Hercegovine.

### **II. RAZLOZI ZA DONOŠENJE**

Predstavnički dom Parlamentarne skupštine BiH je na 21. sjednici, održanoj 28. 8. 2024, donio Zaključak broj: 01-50-1-15-21/24, odnosno time usvojio Izvještaj Komisije za borbu protiv korupcije Predstavničkog doma Parlamentarne skupštine BiH o provođenju javnog saslušanja predstavnika Instituta za mjeriteljstvo Bosne i Hercegovine i Savjeta za mjeriteljstvo Bosne i Hercegovine, a u vezi s donošenjem novih podzakonskih akata. Prethodno, Komisija za borbu protiv korupcije Predstavničkog doma Parlamentarne skupštine BiH (u daljnjem tekstu: Komisija) održala je 27. 5. 2024. javno saslušanje predstavnika Instituta za mjeriteljstvo Bosne i Hercegovine (u daljnjem tekstu: Institut) i Savjeta za mjeriteljstvo Bosne i Hercegovine (u daljnjem tekstu: Savjet), a u vezi s donošenjem novih podzakonskih akata, te na 8. sjednici, održanoj 12. 6. 2024, usvojila Izvještaj o provođenju javnog saslušanja predstavnika Instituta i Savjeta, te predložila zaključke.

Predstavnički dom Parlamentarne skupštine BiH podržao je sljedeće zaključke:

1. "Predstavnički dom Parlamentarne skupštine BiH smatra da je mjeriteljstvo ozbiljna oblast u kojoj postoji prevelika samostalnost u odlučivanju rukovodioca Instituta za mjeriteljstvo BiH te da nisu dovoljno uključene zakonom definirane institucije, posebno Vijeće za mjeriteljstvo BiH, i da je potrebna veća institucionalna kontrola, transparentnost, kao i učešće stručne javnosti.
2. Predstavnički dom Parlamentarne skupštine BiH traži od Vijeća ministara BiH da u roku od 90 dana uputi u parlamentarnu proceduru izmjene i dopune Zakona o mjeriteljstvu Bosne i Hercegovine u smislu da se preciznije definira uloga Vijeća za mjeriteljstvo BiH, razmotri zakonska mogućnost usklađivanja s najboljim praksama u okruženju i standardima EU kada je u pitanju mjerenje gledanosti i da veći značaj parlamentarnom nadzoru.
3. Predstavnički dom Parlamentarne skupštine BiH prosljeđuje relevantnim pravosudnim institucijama Izvještaj o provođenju javnog saslušanja predstavnika Instituta za mjeriteljstvo Bosne i Hercegovine i Vijeća za mjeriteljstvo Bosne i Hercegovine, a u vezi s donošenjem novih podzakonskih akata, kao i neautorizirani transkript."

Kako Vijeće ministara BiH nije uputilo u parlamentarnu proceduru izmjene i dopune Zakona o mjeriteljstvu BiH u naloženom periodu od 90 dana, ovaj prijedlog izmjena i dopuna Zakona o mjeriteljstvu BiH predlaže zakonodavna rješenja u vezi s navedenim zaključcima.

S tim u vezi Komisija za borbu protiv korupcije Predstavničkog doma Parlamentarne skupštine BiH je na sjednici 16. 1. 2025. razmatrala Prijedlog zakona o izmjenama i dopunama Zakona o mjeriteljstvu Bosne i Hercegovine, te na sjednici od 4. 2. 2025. usvojila Prijedlog zakona o izmjenama i dopunama Zakona o mjeriteljstvu Bosne i Hercegovine, koji prosljeđuje Parlamentarnoj skupštini BiH na usvajanje po hitnoj proceduri.

Kao što je u tekstu ukazano, u postojećem Zakonu o mjeriteljstvu BiH navedene su obavezne konsultacije direktora Instituta u vezi s donošenjem propisa i drugih akata, što nije poštovano u slučaju donošenja podzakonskih akata iz 2023. godine.

Prvi veoma bitan zaključak Komisije odnosi se na jačanje uloge Savjeta za mjeriteljstvo BiH, koji je do sada imao ulogu konsultativnog tijela i koji je pored te dodijeljene uloge u kontinuitetu ili nije bio imenovan od Vijeća ministara BiH, ili je bio izbjegavan, prilikom donošenja posljednjeg seta podzakonskih akata iz 2023. godine. Uloga Savjeta treba da bude regulatorna i kontrolna, te ključna u procesima razvoja mjeriteljskog sistema Bosne i Hercegovine, pogotovo u procesima zakonodavne regulacije, jer takvi procesi ne smiju i ne mogu biti prepušteni pojedincu na odlučivanje. Sve bitne promjene moraju biti u nadležnosti države i rad Savjeta za mjeriteljstvo BiH mora biti nadziran od Vijeća ministara BiH. Također, podzakonskim aktima se definiraju i mjerila u zakonskom mjeriteljstvu u BiH koja su predmet tipskog ispitivanja i odobrenja tipa, odnosno ocjenjivanja usklađenosti mjerila, te verifikacije u propisanim rokovima. Potrebno je uskladiti listu mjerila u zakonskom mjeriteljstvu s praksom u EU državama (direktive iz oblasti mjeriteljstva i smjernice Evropske organizacije za zakonsko mjeriteljstvo – WELMEC) i preporučenom praksom za zakonsko mjeriteljstvo na svjetskom nivou, što definira Međunarodna organizacija za zakonsko mjeriteljstvo - OIML. Posebno je potrebno izvršiti izmjene postojećih podzakonskih akata koji obuhvataju mjerila koja nemaju, niti su kroz historiju imala primjenu u zakonskom mjeriteljstvu, niti je za njih moguće naći primjere upotrebe na međunarodnom nivou. Poseban akcent se stavlja na potrebu da se onemogućí nezakoniti i potencijalno koruptivni uticaj na oblast mjerenja televizijske gledanosti, koja ima ne samo efekta na održivost nezavisnih medija, već i na medijski pluralizam i slobodu javnog informiranja građana Bosne i Hercegovine.

Mjerenje navike - gledanosti ni u jednoj državi nije pod vladinim sektorom iz razloga što treba da osigura da se na TV kuće koje vrše produkciju ne vrši pritisak s političkog nivoa, te da se ne guši sloboda medijskog prostora. Iz tog razloga mjerenje gledanosti se osigurava putem udruženja medijske industrije koje uključuje sve TV kuće koje djeluju na određenom prostoru gdje se mjeri gledanost. Glavni cilj takvih udruženja je, po uzoru na zapadnoevropska tržišta gdje takva tržišna udruženja postoje već decenijama, osigurati i kontinuirano unapređivati transparentan i nepristran sistem mjerenja TV gledanosti primjenom međunarodnog standarda za mjerenje TV gledanosti, istraživanjem TV gledanosti putem peoplemetra.

### **III. PRINCIPI NA KOJIMA JE ZASNOVAN PRIJEDLOG**

Prijedlog zakona o izmjenama i dopunama Zakona o mjeriteljstvu u Bosni i Hercegovini zasnovan je na principima nepristrasnosti, transparentnosti, nezavisnosti i povjerenja kako bi se osigurala zaštita pravne sigurnosti, dobra mjeriteljska praksa u zakonskom mjeriteljstvu i pouzdanost u rezultate mjerenja s krajnjim ciljem zaštite potrošača.

Izmjene će doprinijeti u konačnici efikasnosti, pravičnosti i transparentnosti, kao i pluralizma i ekonomske održivosti medija, odnosno informiranja građana u javnom interesu, te će osigurati putem izmijenjene Naredbe o periodičnom pregledu mjerila da mjerila gledanosti (peoplemetri) neće biti regulirana u zakonskom mjeriteljstvu.

Predložene izmjene Zakona pružaju osnovu i za principe dobre prakse vezane za oblast mjeriteljstva u pogledu zaštite potrošača što je jedan od osnovnih temelja zakonskog mjeriteljstva, te jedan od elemenata uključenih u Sporazum o stabilizaciji i pridruživanju u jedinstveno unutrašnje tržište EU.

Jačanjem oblasti mjeriteljstva i transparentnosti mjeriteljskog sistema, što je ovim izmjenama Zakona omogućeno, podržava se povjerenje u mjerenja koja su izvršena u BiH, te time se



indirektno promovira i jača konkurentnost bh. privrede na EU tržištu i globalno. Stvaranjem ovakvog pravnog okvira uspostavlja se garant za pouzdana mjerenja u BiH, doprinosi se jačanju infrastrukture kvaliteta, te se omogućavaju trgovinski sporazumi.

Koliko je bitno imati funkcionalan Savjet za mjeriteljstvo BiH, kontinuirano ukazuje Evropska komisija kroz svoje izvještaje, gdje se naglašava da je potrebno da se osigura rad Savjeta putem preporuka sa sastanaka tijela EU-BiH (Odbor za stabilizaciju i Pododbor za trgovinu, industriju, carine i oporezivanje) u brojnim izvještajima o napretku za BiH. Evropska komisija u svojim izvještajima koji se odnose na mjeriteljstvo dodatno ukazuje i naglašava potrebu za jačanjem pravne sigurnosti i obezbjeđivanja preduslova za jedinstveni ekonomski prostor.

Izvještaji Evropske komisije koji ukazuju na navedene preporuke mogu se detaljnije pogledati preko sljedećih linkova:

<https://www.dei.gov.ba/bs/page-stabilization-agreement>

[https://www.dei.gov.ba/uploads/documents/pododbor-za-trgovinu-industriju-carinu-i-oporezivanje-drugi-sastanak-sarajevo\\_1604486770.pdf](https://www.dei.gov.ba/uploads/documents/pododbor-za-trgovinu-industriju-carinu-i-oporezivanje-drugi-sastanak-sarajevo_1604486770.pdf)

[https://www.dei.gov.ba/uploads/documents/odbor-preporuke-3-sastanak-brisel-2732018\\_1608477343.pdf](https://www.dei.gov.ba/uploads/documents/odbor-preporuke-3-sastanak-brisel-2732018_1608477343.pdf)

[https://neighbourhood-enlargement.ec.europa.eu/document/download/b6ce79f2-cde7-429f-aa06-a0e1a8860072\\_en?filename=20190529-bosnia-and-herzegovina-analytical-report.pdf](https://neighbourhood-enlargement.ec.europa.eu/document/download/b6ce79f2-cde7-429f-aa06-a0e1a8860072_en?filename=20190529-bosnia-and-herzegovina-analytical-report.pdf)

[https://neighbourhood-enlargement.ec.europa.eu/document/download/f28c86d0-25e4-454b-9949-bd9470686073\\_en?filename=bosnia\\_and\\_herzegovina\\_report\\_2020.pdf](https://neighbourhood-enlargement.ec.europa.eu/document/download/f28c86d0-25e4-454b-9949-bd9470686073_en?filename=bosnia_and_herzegovina_report_2020.pdf)

[https://neighbourhood-enlargement.ec.europa.eu/bosnia-and-herzegovina-report-2021\\_en](https://neighbourhood-enlargement.ec.europa.eu/bosnia-and-herzegovina-report-2021_en)

Iz svega navedenog veoma je značaja pravilna uspostava Savjeta za mjeriteljstvo BiH koji će biti stručno, regulatorno, savjetodavno i kontrolno tijelo Instituta, koje djeluje u okviru Instituta, s ciljem razvoja mjeriteljstva u BiH.

#### **IV. USKLAĐENOST PROPISA S EVROPSKIM ZAKONODAVSTVOM**

Zakona o mjeriteljstvu BiH predstavlja osnovni pravni okvir za mjeriteljski sistem u Bosni i Hercegovini i usklađuje se sa zakonodavstvom EU. Problematikom zakonskog mjeriteljstva u EU se bavi Evropska organizacija za zakonsko mjeriteljstvo - WELMEC i s ciljem omogućavanja lakšeg i unificiranog provođenja EU legislative u državama članicama izrađuje niz vodiča za lakšu primjenu direktiva u državama članicama EU i državama sa statusom kandidata za EU članstvo. Reguliranje mjerila u zakonskom mjeriteljstvu na nivou jedne države obuhvata propisivanje i definiranje sljedećeg: vrste mjerila, stavljanje mjerila na tržište, način upotrebe mjerila, potvrđivanje mjeriteljskih karakteristika mjerila i pozivanje na propise IMBIH o načinu označavanja mjerila nakon stavljanja u upotrebu. Propisi IMBIH se kontinuirano usklađuju s legislativom EU u pogledu mjerila u harmoniziranoj oblasti (WELMEC) i s međunarodnom praksom u zakonskom mjeriteljstvu, a na osnovu preporuka Međunarodne organizacije za zakonsko mjeriteljstvo (OIML), što je temelj međunarodnopriznatog sistema mjeriteljstva u EU i u okviru OIML. Na ovaj način je omogućeno prevazilaženje tehničkih barijera u prometu robe (TBT), odnosno slobodno kretanje robe i integracija BiH u jedinstveno tržište EU.

Specifična oblast mjeriteljstva ima cilj usklađivanje s relevantnim direktivama Novog pravnog okvira u EU, što obuhvata dvije direktive Novog pravnog okvira, koje su date Institutu za

mjeriteljstvo BiH u nadležnost prema Odluci o planu aktivnosti za realiziranje programa preuzimanja tehničkih propisa („Službeni glasnik BiH“, broj 89/06), u skladu sa Zakonom o tehničkim zahtjevima za proizvode i ocjenu usklađenosti („Službeni glasnik BiH“, broj 45/04) (lex generalis). Zakon o mjeriteljstvu BiH je posebni zakon za tehničke propise iz oblasti mjeriteljstva i u tom kontekstu je lex specialis. Aktuelne mjeriteljske direktive Novog pravnog okvira u EU su: Direktiva o neautomatskim vagama 2014/31/EU (NAWID) i Direktiva o mjernim instrumentima 2014/32/EU (MID). Aktuelna NAWID je donesena 2014. godine, a ona je zamijenila Direktivu 2009/23/EC, koja je preuzeta u Naredbu o neautomatskim vagama („Službeni glasnik BiH“, broj 47/11), te je i ovaj nivo legislative potrebno preispitati u odnosu na aktuelnu EU direktivu 2014/31/EU. Transpozicija odredbi MID direktive je urađena putem donesenih 13 podzakonskih akata Zakona o mjeriteljstvu BiH, koji su prošli proceduru ocjenjivanja usklađenosti i potvrđivanja tabela o usklađenosti od strane Direkcije za evropske integracije BiH i koji su objavljeni u „Službenom glasniku BiH“, broj 26/18). Također, Zakon o mjeriteljstvu BiH je osnova za transpoziciju i provođenje direktiva Starog pristupa za oblast pretpakiranih proizvoda. Institut je objavio i proveo Pravilnik o mjeriteljskim zahtjevima za pretpakirane proizvode („Službeni glasnik BiH“, broj 75/14) koji se oslanja na Direktivu 76/211/EEC (Pakiranje određenih pretpakiranih proizvoda označenih masom ili volumenom), te Pravilnik o mjeriteljskim uslovima za mjerne boce („Službeni glasnik BiH“, broj 71/23) kojim se transponira Direktiva 75/107/EEC (Boce koje se upotrebljavaju kao mjerni spremnici).

## **V. OBRAZLOŽENJE PREDLOŽENIH RJEŠENJA**

Izmjene člana 1, odnosno novi st. 3. i 4. ukazuju na usklađivanje s pravnim naslijeđem u EU (Acquis Communautaire) i direktivama iz oblasti mjeriteljstva.

Izmjenom člana 4. uvode se novi st. 3, 4. i 5. s kojima se jasno propisuju mjerila koja mogu biti predmetom zakonskog mjeriteljstva, a to su mjerila koja imaju primjenu u zemljama EU ili na međunarodnom nivou na osnovu preporuka Međunarodne organizacije za zakonsko mjeriteljstvo (OIML) i mjerila koja se kroz historiju koriste u Bosni i Hercegovini. Drugim riječima, samo ona mjerila za koja postoje direktive EU za oblast mjeriteljstva i preporuke OIML ili međunarodno priznati normativni dokumenti za ocjenjivanje usklađenosti za ispitivanje i odobrenje tipa mjerila, te verifikacije mjerila mogu biti predmet zakonskog mjeriteljstva. Ovo zahtjeva izmjene trenutno važećih propisa Naredbe o periodičnom pregledu mjerila i rokovima verifikacije i Uredbe o visini i načinu plaćanja usluga Institutu za mjeriteljstvo Bosne i Hercegovine („Službeni glasnik BiH“, broj 71/23) u kojima će se naći samo ona mjerila koja imaju jasno uporište u međunarodnim i EU normativnim dokumentima u oblasti mjeriteljstva. Ova dva propisa (naredba i uredba definirane u stavu 3.) koja se direktno odnose na mjerila koja će biti predmet zakonskog mjeriteljstva Bosne i Hercegovine donosi Vijeće ministara BiH, na prijedlog Instituta, uz pribavljenu saglasnost Savjeta. Ovdje ne smije nastati zastoј u donošenju ovih propisa jer se oni odnose na mjerno tehničke uslove zasnovane na međunarodno priznatim normativnim dokumentima. Također, naglašavamo da je i do sada bila jasno navedena osnova za zakonsko mjeriteljstvo u BiH u članu 1. stav 2, odnosno navedeno je da je sistem zakonskog mjeriteljstva usklađen s odgovarajućim sistemom u Evropskoj uniji (što je preduslov za integraciju u unutrašnje tržište Unije).

Također je propisana uloga Savjeta bez čije obavezne saglasnosti se sprečava prevelika samostalnost u odlučivanju rukovodioca Instituta pri donošenju drugih podzakonskih akata Instituta, kao i bitne stvari za razvoj mjeriteljskog sistema Bosne i Hercegovine i samog Instituta. Uzimajući dosadašnju praksu u obzir koja je često sprečavala imenovanje Savjeta u

uzastopnim mandatima, odnosno u slučaju da Savjet nije imenovano ili slučaj kada se Savjet ne sastaje, donošenje podzakonskih akata se dostavlja Vijeću ministara BiH na usvajanje i donošenje, što je ovim prijedlogom jasno definirano.

Dosadašnji st. 3, 4. i 5. postaju st. 6, 7. i 8.

Dosadašnji stav 6. postaje stav 9. u kojem se iza riječi „u skladu sa“ zamjenjuje ostatak teksta riječima : „standardom BAS EN ISO/IEC 17020.“

Kako se ovaj stav veže na ulogu Savjeta gdje je ranije u ovom stavu prilikom imenovanja laboratorija za oblast verifikacije mjerila bila navedena primjena familije standarda EN 45000 koja se više ne primjenjuje pod tom kodifikacijom, te standard ISO/IEC 17025 koji se primjenjuje isključivo u ispitnim i kalibracionim laboratorijama, njega je neophodno izmijeniti u skladu s važećim normativnim aktima. Kako se u oblasti imenovanih laboratorija koje se bave verifikacijom mjerila koristi primjena standarda BAS EN ISO/IEC 17020 (nekadašnji standard EN 45004 iz familije standarda EN 45000) kojim se potvrđuje njihova kompetentnost, on se navodi u izmijenjenom stavu. Također se briše procedura jednakovrijedna proceduri akreditiranja, jer ta odredba navedena u vrijeme prije objavljivanja Zakona o osnivanju Instituta za akreditiranje BiH („Službeni glasnik BiH, broj 10/02). Kako je Institut za akreditiranje BiH član Evropske akreditacije (EA) i potpisnik Multilateralnog sporazuma s Evropskom akreditacijom (EA MLA) u akreditacionoj šemi u skladu sa standardom ISO/IEC 17020, tako nema potrebe za procedurom jednakovrijednoj proceduri akreditacije jer bi svaka procedura jednakovrijedna proceduri akreditiranja bila u suprotnosti sa zakonodavstvom BiH. Isto obrazloženje se odnosi i na član 15, član 22. stav 1. i član 27. stav 2. u kojem se briše procedura jednakovrijedna proceduri akreditacije. Također, imenovanje mjeriteljskih laboratorija iz člana 4. je regulirano zasebnim podzakonskim aktom, naime Pravilnikom o imenovanim mjeriteljskim laboratorijama („Službeni glasnik BiH“, Broj 75/14), koji je definirao standard BAS EN ISO/IEC 17020 kao relevantan za dokazivanje kompetencija ovog tijela još 2014. godine.

Član 5. se mijenja i kroz isti se opisuje uloga Savjeta.

Ovim se jača uloga Savjeta u skladu sa zaključcima Predstavničkog doma Parlamentarne skupštine BiH kojim se zahtjeva jačanje uloge Savjeta bez čije saglasnosti neće biti moguće donošenje bitnih propisa, te uključivanje stručne javnosti i zainteresiranih strana, kako bi rad Instituta bio transparentan i kako bi se spriječila moguća zloupotreba koja trenutno postoji u trenutnom Zakonu o mjeriteljstvu BiH data kroz preveliku samostalnost u odlučivanju rukovodiocu Instituta.

Uloga Savjeta više nije samo savjetovanog karaktera, već je od njega obavezno dobiti saglasnost prilikom donošenja propisa. Slične primjere možemo naći kroz Zakon o lijekovima i medicinskim sredstvima („Službeni glasnik BiH“, broj 58/08) u kojem je propisan Stručni savjet koji djeluje kao stručno, regulatorno, savjetodavno i kontrolno tijelo Agencije za lijekove i medicinska sredstva BiH.

Uvodi se jasan broj članova Savjeta koji ranije nije bio definiran, iako je u prva dva mandata broj članova bio 15 na prijedlog rukovodioca Instituta. Prethodno je bilo definirano da članove predlažu direktor Instituta i direktori entitetskih institucija, međutim kako je Savjet tijelo koje imenuje Vijeće ministara BiH koje bi ubuduće trebalo imati snažniju ulogu u nadzoru nad radom Savjeta, predlaže se da članove sa šireg spiska stručnjaka bira Vijeće ministara BiH, na prijedlog Instituta i entitetskih vlada.

Ranije nije postojala odredba koja je ukazivala na jasan zahtjev ko može biti član Savjeta, odnosno da članovi moraju biti dokazani stručnjaci iz oblasti mjeriteljstva, bilo da dolaze iz

mjeriteljske infrastrukture (koje su dio uprave, javnih ustanova, preduzeća ili privrede) ili akademске zajednice. Institut će pokrenuti proceduru javnog poziva za članove Savjeta koje on delegira, odnosno navodi na širu listu. Time na poziv će se moći odazvati svi stručnjaci iz oblasti mjeriteljstva koji zadovoljavaju propisane zahtjeve. Također, prijedlozi entitetskih vlada će sadržavati šire liste predloženih stručnjaka iz oblasti mjeriteljstva. Institut je dužan da objedini sve pristigle prijave i prijedloge iz entitetskih vlada, a te dostavi širu listu stručnjaka prema Vijeću ministara BiH, uz dostavljanje njihovih biografija. Ovim se na transparentno može sagledati biografija stručnjaka koji su potencijalni članovi Savjeta.

Odlučivanje unutar rada Savjeta, a u vezi s davanjem saglasnosti na donošenje propisa, kao i po ostalim pitanjima, ostvaruje se većinom glasova od ukupnog broja imenovanih članova Savjeta, izuzev propisa navedenih u članu 4. stav 3. koje direktno donosi Vijeće ministara BiH. Za donošenje odluka u Savjetu moraju biti zastupljeni glasovi po jednog člana predloženog iz oba entiteta i jednog predloženog od strane Instituta. Ako Savjet ne donese odluku koja se tiče davanje saglasnosti na donošenje propisa, ne održi sjednicu ili nije imenovan, tada Institut dostavlja propis Vijeću ministara BiH na usvajanje, bez odgađanja.

Ovim se sprečava zastoj u reguliranju propisa mjeriteljskog sistema u BiH, te bilo koje odluke o kojima Savjet ne može postići dogovor prosljeđuju se Vijeću ministara BiH na odlučivanje.

Savjet se mora sastajati najmanje kvartalno u toku jedne godine. Sjednicama Savjeta, po obaveznom pozivu, prisustvuju direktor i zamjenik direktora Instituta, te direktori entitetskih institucija za mjeriteljstvo. Kako bi se osnažila uloga Vijeća ministara BiH u radu Instituta, Savjet o svom radu izvještava Vijeće ministara BiH najmanje jednom godišnje ili na zahtjev Vijeća ministara BiH.

Savjet je bio imenovan u dva navrata u vremenu od 2008. do 2024. godine. Postojao je period od 2012. do 2020. godine u kojem nije bilo imenovanog Savjeta, što je dovelo do donošenja velikog broja podzakonskih akata koji su doneseni bez konsultacija sa Savjetom i koji su predmet osporavanja iz različitih izvora već duži niz godina. Zadnji mandat Savjeta sastao se svega dva puta u četiri godine. Kako bi se podigao nivo ozbiljnosti i profesionalnosti u radu Savjeta, stavlja mu se u obavezu sastajanje najmanje jednom kvartalno u toku jedne godine, te se predviđa novčana naknada za rad koja se isplaćuje isključivo ukoliko se sjednica održi. Novčana naknada bi trebala pokriti troškove prijevoza članova koji dolaze na sjednice Savjeta, kao i dnevnice za rad u njemu. Visinu novčane naknade određuje Vijeće ministara BiH po uzoru na slična tijela koja su imenovana na državnom nivou i one će se planirati kroz budžet Instituta.

Slijedeći članovi se mijenjaju: član 10. stav 3., član 12. stav 1., član 13. stav 2. član 16., član 21. stav 5., član 22. stav 1., član 22. stav 2., član 26. stav 2., član 27. stav 2., član 29. stav 4., član 33. st. 1. i 2., te član 39. stav 1., član 42. stav 2., član 43., član 48. stav 5., 6. i 7.

U članovima (član 10. stav 3., član 12. stav 1., član 13. stav 2. član 16., član 21. stav 5., član 22. stav 2., član 33. stav 2., te član 39. stav 1.) Zakona o mjeriteljstvu BiH riječ „konsultacije“ zamjenjuje se riječju „saglasnost“. Ove izmjene su urađene u skladu sa zaključkom Predstavničkog doma Parlamentarne skupštine BiH kojim se zahtijeva jačanje uloge Savjeta bez čije saglasnosti neće biti moguće donošenje bitnih propisa, a što je već opisano gore kroz obrazloženja koja se odnose na rad Savjeta. Direktor predstavlja Institut, međutim da bi se donijela bilo kakva bitna odluka za razvoj mjeriteljstva i Instituta, potrebno je profesionalno pristupiti rješavanju problema kroz rad stručnih radnih tijela, Kolegija Instituta i Savjeta prije donošenja nekog akta od strane direktora Instituta. Članovi Savjeta se mogu razriješiti ukoliko izostaju sa sjednica u dva navrata uzastopno ili svjesno blokiraju rad Savjeta.

Član 22. stav 1. briše se dio teksta koji glasi: „ili po pravilima koja su jednakovrijedna kao i pravila akreditiranja“, koji je obrazložen u tekstu iznad.

Član 26. stav 2. koji je glasio: „Direktor Instituta može u iznimnim slučajevima dozvoliti upotrebu pojedinih vrsta mjerila bez prethodnog provođenja postupka ispitivanja tipa, o čemu donosi pismeno rješenje.“ se u potpunosti briše, jer ne postoji mjerilo koje može biti pušteno na tržište i rad bez prethodno provedenog ispitivanja i odobrenja tipa.

Član 27. stav 2. briše se dio teksta koji glasi: „ili proceduru jednakovrijednu akreditaciji“, koji je obrazložen u tekstu iznad.

Član 29. stav 4. mijenja se i glasi:

„Naredna verifikacija mjerila vrši se u rokovima koje za pojedinu vrstu mjerila propiše Vijeće ministara na prijedlog Instituta, a uz saglasnost Savjeta“.

Član 33. stav 1. mijenja se i glasi:

„Direktor Instituta uz saglasnost Savjeta propisuje način i sadržaj mjeriteljskog nadzora za mjerila u skladu s članom 4. st. 3 i 5. ovog zakona.“ Obrazloženo u tekstu iznad, a odnosi se na mjerila koja mogu biti predmetom zakonskog mjeriteljstva.

Član 42. u stavu 2. u zagradi navodi se sljedeće (član 5., stav 12.; član 6.; član 7., stav 1.; član 8., stav 2.; član 11., stav 4.). Ovdje je dodato pozivanje na novi stav iz člana 5. (član 5. stav 12) koji definira novčanu naknadu za rad članova Savjeta na sjednicama.

Član 43. mijenja se i glasi:

„Vijeće ministara BiH, na prijedlog direktora Instituta, uz saglasnost Savjeta, donosi uredbu s tarifom o visini i načinu plaćanja usluga koje Institut pruža trećim licima.“

Ova dva člana su usko vezana za obrazloženje izmjena člana 4. stav 5. navedenog u članu 2. ovog Zakona o izmjenama i dopunama Zakona o mjeriteljstvu BiH. Mjerila koja nemaju jasno uporište u međunarodnim i EU normativnim dokumentima u oblasti mjeriteljstva ne mogu biti predmetom zakonskog mjeriteljstva. Ukoliko postoji potreba države za uvođenjem novih mjerila u oblast zakonskog mjeriteljstva, ona moraju biti zasnovana na istraživačkim studijama kroz ekspertne radne grupe, Kolegij Instituta, o čemu saglasnost dolazi od Savjeta, a njih donosi Vijeće ministara BiH.

Član 48. iza st. 1, 2, 3. i 4., dodaju se st. 5., 6. i 7.

U prelazne i završne odredbe dodaju se novi stavovi u kojima se daje rok u kojem direktor Instituta mora dostaviti prijedlog za podzakonske akte kojim se definiraju mjerila koja su dio zakonskog mjeriteljstva, u skladu s članom 4. st. 3. i 5. propisanim kroz član 2. ovog Zakona o izmjenama i dopunama Zakona o mjeriteljstvu BiH. Također se propisuje obaveza da se svi podzakonski akti za mjerila koja će se naći u novoj naredbi o mjerilima u zakonskom mjeriteljstvu i rokovima verifikacije moraju preispitati ukoliko su ranije doneseni bez učešća Savjeta za mjeriteljstvo BiH u periodu od šest mjeseci od dana donošenja ovog Zakona o izmjenama i dopunama Zakona o mjeriteljstvu BiH.

Stupanjem na snagu ovog Zakona o izmjenama i dopunama Zakona o mjeriteljstvu BiH i donošenjem novih podzakonskih akata usklađenih s odredbama ovog Zakona o izmjenama i dopunama Zakona o mjeriteljstvu BiH povlače se svi ranije doneseni podzakonski akti koji su doneseni bez učešća Savjeta.

Stav 7. navodi akte koji se dodatno stavljaju van snage. Tu je direktno naveden akt koji se odnosi na mjerenje gledanosti (peoplemeter), koji u skladu s članom izmijenjenim članom 4. stavom 5. neće više biti dio zakonskog mjeriteljstva u BiH. S tim u vezi stavljaju se van snage prethodni pravilnici: Pravilnik o mjeriteljskim i tehničkim zahtjevima za mjerila gledanosti ("Službeni glasnik BiH", broj 75/14) i Pravilnik o mjeriteljskim i tehničkim zahtjevima za mjerila gledanosti (peoplemeter) broj 03-02-3-1364-2/12 od 11.3.2013, kao i drugi akti kojim se reguliraju ili su regulirana mjerila televizijske gledanosti.

Važno je napomenuti da je presudom Suda BiH broj: S1 3 U 047677 24 Usoz, od 18.12.2024. stavljen van snage Pravilnik o mjeriteljskim i tehničkim zahtjevima za mjerila gledanosti objavljen u "Službenom glasniku BiH", broj 71/23 od 13. 10. 2023, sa ispravkom objavljenom u "Službenom glasniku BiH", broj 5/24 od 19.1.2024. Nakon ove presude, vraćen je pravilnik iz 2014. godine, te se i ovaj akt, kao i prethodni podzakonski akt i drugi podzakonski akti u vezi mjerenja gledanosti ovim izmjenama i dopunama stavljaju van snage. Ovim će se omogućiti preduslov za transparentan i nepristran sistem mjerenja TV gledanosti, koji je primijenjen u drugim državama EU.

## VI. POTREBNA FINANSIJSKA SREDSTVA

Realizacija odredbi ovog prijedloga će zahtijevati dodatna sredstva i bit će osigurana u budžetu institucija BiH i međunarodnih obaveza BiH vezano za novčane naknade za rad članova Savjeta.

## PREGLED ODREDBI ZAKONA KOJE SE MIJENJAJU

### Član 1.

1. Ovim zakonom uređuje se sistem zakonskog mjeriteljstva u Bosni i Hercegovini koji osigurava tačna i međunarodno usklađena mjerenja, ostvarivanje, čuvanje i upotrebu etalona i referentnih materijala; upotrebu, ispitivanje, verifikaciju i mjeriteljski nadzor nad mjerilima; primjenu zakonskog mjeriteljstva u Bosni i Hercegovini; učešće Bosne i Hercegovine u međunarodnoj i međudržavnoj saradnji u području mjeriteljstva; naučno-istraživački i stručni rad u području mjeriteljstva.

2. Sistem zakonskog mjeriteljstva usklađen je sa odgovarajućim sistemom u Evropskoj uniji (što je preduslov za integraciju u Unutrašnje tržište Unije).

### Član 4.

1. Institut za mjeriteljstvo (u daljem tekstu: Institut) obavlja upravne, stručne i organizacione poslove na području zakonskog mjeriteljstva u Bosni i Hercegovini, određene ovim zakonom i nadzire njegovo provođenje.

2. Institut ostvaruje etalonsku bazu u Bosni i Hercegovini, razvija, stvara, proglašava i održava državne etalone zakonskih mjernih jedinica, osigurava sljedivost državnih etalona prema međunarodnim etalonima, propisuje mjeriteljske zahtjeve za etalone, referentne materijale i mjerila, donosi odluke o priznavanju etalona za državne etalone, provodi ocjenjivanje usklađenosti uključujući, ispitivanje tipa mjerila i odobrenje tipa mjerila.

3. Entitetske institucije za mjeriteljstvo pod okriljem Vlade Federacije BiH i Vlade Republike Srpske vrše prvu i naredne verifikacije mjernih instrumenata koji su uspješno prošli proceduru ocjenjivanja usklađenosti i sve druge poslove iz oblasti mjeriteljstva koji nisu u nadležnosti Instituta što će biti propisano posebnim zakonom entiteta.

4. Etalone, referentne materijale i opremu za verifikaciju koje posjeduju entitetske institucije za mjeriteljstvo kalibriše i verificira Institut u skladu sa propisima usklađenim sa preporukama i dokumentima Međunarodne organizacije za zakonsko mjeriteljstvo-OIML.

5. Institut se bavi istraživačko-razvojnom djelatnošću u oblasti mjeriteljstva, predlaže i određuje prioritete realizacije razvojnih projekata u oblasti mjeriteljstva, te učestvuje u radu međunarodnih organizacija za mjeriteljstvo i u njima predstavlja Bosnu i Hercegovinu. Institut provodi međudržavne ugovore o saradnji u oblasti mjeriteljstva.

6. Direktor Instituta uz saglasnost Savjeta vrši imenovanje mjeriteljskih laboratorija i centara za verifikaciju koje su prethodno prošle proceduru akreditiranja u skladu sa standardima Serije EN 45000, odnosno ISO 17025 ili proceduru jednakovrijednu proceduri akreditiranja.

### Član 5.

1. Usmjeravanje razvoja djelatnosti Instituta obavlja Savjet za mjeriteljstvo (u daljem tekstu: Savjet) koji djeluje u okviru Instituta.

2. Zadaci Savjeta su da:

- a) djeluje kao stručno savjetodavno tijelo,
  - b) u dogovoru sa entitetskim mjeriteljskim institucijama predlaže načine zadovoljavanja mjeriteljskih potreba Bosne i Hercegovine,
  - c) učestvuje u formiranju stručnih mjeriteljskih komisija koje razmatraju pojedine aspekte zakonskog mjeriteljstva i rezultate prezentiraju Savjetu,
  - d) predlaže naučne i obrazovne aktivnosti u području mjeriteljstva,
  - e) daje stručnu ocjenu godišnjih planova i izvještaja o radu Instituta i entitetskih institucija za mjeriteljstvo u Federaciji BiH i Republici Srpskoj na zahtjev Vijeća ministara BiH ili resornog ministra.
3. Članove Savjet imenuje Vijeće ministara Bosne i Hercegovine na prijedlog direktora Instituta i entitetskih institucija za mjeriteljstvo u Federaciji BiH i Republici Srpskoj.
4. Eksperti koji sačinjavaju Savjet su iz oba entiteta Bosne i Hercegovine.
5. Savjet donosi poslovnik o radu Savjeta.
6. Stručne i tehničke poslove za Savjet obavljaju odgovarajuće stručne službe Instituta.

#### **Član 12.**

- 1. Verifikaciju državnih etalona vrši Institut na način i prema mjernim metodama koje propisuje direktor Instituta uz konsultacije sa Savjetom u formi mjeriteljskih uputstava.
- 2. Ukoliko se pri kalibraciji ustanovi da državni etalon ne zadovoljava propisane mjeriteljske zahtjeve, direktor Instituta će rješenjem poništiti akt o priznavanju etalona za državni etalon.
- 3. Protiv rješenja iz stava 2. ne može se uložiti žalba Institutu, ali se može pokrenuti upravni spor.

#### **Član 13.**

- 1. Uzorke certificiranih referentnih materijala propisanih mjeriteljskih osobina ostvaruje, čuva, održava i upoređuje sa međunarodnim uzorcima Institut ili imenovano pravno lice.
- 2. Direktor Instituta uz konsultacije sa Savjetom donosi propise kojima se definišu osobine certificiranih referentnih materijala i primjena certificiranih referentnih materijala za kalibraciju i verifikaciju mjerila.

#### **Član 15.**

Ispitivanje i verifikacija etalona i mjerila obavljaju se u mjeriteljskim laboratorijima i centrima za verifikaciju mjerila koje imenuje direktor Instituta.



2. Direktor Instituta može imenovati samo ona pravna lica koja su prethodno prošla proceduru akreditiranja u skladu sa evropskim standardima serije EN 45000, odnosno ISO 17025 ili proceduru jednakovrijednu proceduri akreditiranja.

#### **Član 16.**

Direktor Instituta uz konsultacije sa Savjetom propisuje zahtjeve koje moraju ispunjavati mjeriteljske laboratorije i centri za verifikaciju mjerila da bi dobili status imenovanih laboratorija i centara za verifikaciju mjerila.

#### **Član 21.**

1. U Bosni i Hercegovini pravna i fizička lica moraju posjedovati i koristiti u skladu sa ovim zakonom mjerila koja su propisana za obavljanje njihove djelatnosti.

2. U Bosni i Hercegovini se u promet mogu stavljati samo ona mjerila koja ispunjavaju zahtjeve ovoga zakona i mjeriteljske i tehničke zahtjeve sadržane u odgovarajućim propisima i za koje je zahtijevana usklađenost po propisanim načinima i postupcima ocjenjivanja usklađenosti.

3. U promet se mogu pustiti samo ona mjerila koja posjeduju certifikat o usklađenosti i na propisan način su označena.

4. Mjerila, za koja nije ocjenjena usklađenost po propisanim načinima i postupcima ocjenjivanja usklađenosti, koja nisu označena i za njih nije izdat certifikat o usklađenosti sa mjeriteljskim propisima, ne smiju se upotrebljavati.

5. Direktor Instituta uz konsultiranje sa Savjetom, za pojedine vrste mjerila propisuje načine ocjenjivanja usklađenosti, vrste i načina označavanja mjerila te sadržaj i oblik certifikata o usklađenosti sa mjeriteljskim propisima.

#### **Član 22.**

1. Direktor Instituta imenuje pravno lice za ocjenjivanje usklađenosti čija je osposobljenost bila provjerena po pravilima akreditiranja ili po pravilima koja su jednakovrijedna kao i pravila akreditiranja i koje ispunjava dodatne zahtjeve ocjenjivanja usklađenosti koje je propisao direktor Instituta.

2. Direktor Instituta, uz konsultacije sa Savjetom, propisuje postupak imenovanja pravnih lica koja učestvuju u postupku ocjenjivanja usklađenosti.

#### **Član 26.**

1. Direktor Instituta može priznati inostrani certifikat o usklađenosti mjerila sa mjeriteljskim propisima, ako ga je obavio nadležan organ zakonskog mjeriteljstva zemlje u kojoj je izvršeno ocjenjivanje usklađenosti, pod uslovom da Institut sa istim ima zaključen bilateralni ili multilateralni sporazum o priznavanju rezultata ocjenjivanja usklađenosti.

2. Direktor Instituta može u iznimnim slučajevima dozvoliti upotrebu pojedinih vrsta mjerila bez prethodnog provođenja postupka ispitivanja tipa, o čemu donosi pismeno rješenje.

#### **Član 27.**

1. Mjerila za koja je prema ovom zakonu obavezan mjeriteljski nadzor, podliježu prvoj verifikaciji, narednim verifikacijama i vanrednoj verifikaciji.
2. Verifikaciju mjerila, poštujući važeće tehničke propise, vrše entitetske institucije za mjeriteljstvo u Federaciji BiH i Republici Srpskoj ili imenovana pravna lica koja su prethodno prošla proceduru akreditiranja ili proceduru jednako vrijednu akreditiranju.
3. Tehničke propise o verifikaciji (prva, periodična i vanredna verifikacija) donose direktori entitetskih institucija za mjeriteljstvo uz prethodne konsultacije sa direktorom Instituta.
4. Direktor Instituta dužan je upozoriti Vladu Federacije BiH i Vladu Republike Srpske ako nacrt propisa nije usklađen sa odgovarajućim propisom Evropske unije ili odgovarajućim dokumentom OIML-a.
5. O ispravnosti mjerila koja se nalaze u upotrebi dužni su se brinuti vlasnici mjerila ili njihovi korisnici.

#### **Član 29.**

1. Narednoj verifikaciji podliježu mjerila koja se nalaze u upotrebi ili ona koja se čuvaju radi stavljanja u upotrebu i promet.
2. Naredna verifikacija mjerila vrši se obavezno prije nego što istekne rok važnosti prethodne verifikacije.
3. Zahtjev za narednu verifikaciju mjerila podnosi vlasnik ili korisnik mjerila.
4. Naredna verifikacija mjerila vrši se u rokovima koje za pojedinu vrstu mjerila propiše direktor Instituta uz konsultacije sa Savjetom.
5. Mjerilo za koje je istekao rok važnosti verifikacije ne smije se upotrebljavati.

#### **Član 33.**

1. Direktor Instituta uz konsultacije sa Savjetom propisuje mjerila, etalone i referentne materijale nad kojima vrši mjeriteljski nadzor, kao i način i sadržaj mjeriteljskog nadzora.
2. Institut vrši nadzor nad imenovanim laboratorijama, a direktor Instituta uz konsultacije sa Savjetom propisuje način mjeriteljskog nadzora tih laboratorija.

#### **Član 39.**

1. Direktor Instituta uz konsultacije sa Savjetom propisuje način nadzora nad pretpakiranim proizvodima, način označavanja količina i dozvoljena odstupanja stvarne od označene količine.

2. Ako se pri nadzoru utvrdi da pretpakirani proizvod odstupa od propisanih zahtjeva, da nema odgovarajuće oznake količine ili da stvarna količina nije u granicama dozvoljenog odstupanja od naznačene količine, odgovarajuća entitetska institucija za mjeriteljstvo, odnosno tržišna inspekcija će rješenjem zabraniti njihovu prodaju.

#### **Član 42.**

1. Rad Instituta finansira se dvojako: iz budžeta Bosne i Hercegovine i iz prihoda od usluga koje Institut pruža trećim licima.

2. Iz budžeta Bosne i Hercegovine finansiraju se aktivnosti koje su rezultat izričitih naredbi navedenih u ovom zakonu (član 6.; član 7., stav 1.; član 8., stav 2.; član 11., stav 4.).

#### **Član 43.**

Direktor Instituta uz konsultacije sa Savjetom donosi i izdaje uredbu sa tarifom o visini i načinu plaćanja usluga koje Institut pruža trećim licima.

#### **Član 48.**

1. Do donošenja propisa kojima se bliže uređuju pitanja u vezi sa mjeriteljstvom, primjenjivat će se podzakonski akti doneseni na osnovu Zakona o mjernim jedinicama i mjerilima ("Službeni list SFRJ", br. 9/84, 18/84, 59/86, 20/89 i 9/90).

2. Sva odobrenja, certifikati, ovlaštenja i rješenja, donijeta prije stupanja na snagu ovog zakona, ostaju na snazi do donošenja propisa iz stava 1. ovog člana.

3. Žigovi na mjerilima koja su verifikirana prije stupanja na snagu ovoga zakona, ostaju na snazi do roka koji odrede entitetske institucije za mjeriteljstvo.

4. Stupanjem na snagu ovog zakona prestaje da važi Zakon o mjerilima i mjernim jedinicama Republike BiH ("Službeni list RBiH", br. 14/93 i 14/94).